



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
23 Maiu 2014

Tribunál aplika suspensaun ba pena prizaun tinan 4 iha kazu maus tratus ba kónjuje

Iha 22 Maiu 2014, Tribunál Distritál Dili prezide leitura akordaun no kondena arguidu DJP ho pena prizaun tinan 3 suspende ba tinan 4. Tuir faktus ne'ebé produz katak arguidu provadu komete krime maus tratus ba konjuje, iha Dili.

Ministériu Públiku akuza katak iha 25 Maiu 2013, arguidu tuku no tebe iha lezada nia ulun ho kidan. Kazu ne'e akontese tanba arguidu diskunfia lezada namora ho mane seluk tanbá ne'e provoka istori-malu. Agresaun ne'e kauza lezada sente moras iha ulun ho kidan.

Tuir mai, iha 20 Juñu 2013, arguidu kontinua aperta lezada nia kakorok no amiasa ho tudik dehan atu oho lezada, aktus ne'e halo lezada trauma.

“JSMP enkoraja tribunál atu kondena arguidu sira iha kazu maus-tratus ho pena ne'ebé ekilíbriu tuir krime nia natureza no ka pelomenus tenke aplika dever seluk hamutuk ho suspensaun ne'e, atu asegura katak arguidu konsiente pena suspensaun ne'e iha nia efeitu hodi muda nia hahalok”, dehan Diretór Ezekutivu JSMP Luis de Oliveira Sampaio.

Ministériu Públiku akuza arguidu kontra artigu 154 Kódigu Penál kona-ba krime maus tratus ba kónjuje konjuga ho artigu 35 Lei Kontra Violénsia Dométika.

Tuir faktus ne'ebé produz iha julgamentu, tribunál konsidera katak arguidu provadu prátika krime ne'ebé Ministériu Públiku akuza hasoru arguidu.

Durante julgamentu arguidu hatudu nia kolaborasaun iha prosesu no manifesta arependimentu hahalok ne'ebé tribunál konsidera hanesan sirkunstánsia atenuantes.

Kazu ne'e rejista iha tribunál ho Nú. Prosesu 432/2013/TD Dili, representa tribunál koletivu prejde leitura akordaun Dr. Antonio Helder do Carmo. Ministériu Públiku representa husi Dr. José Luis Landim (Prokuradór Internasionál) no arguidu hetan defeza husi Dr. Sergio Paulo Dias Quintas husi Defensória Públiku.

Atu hetan informasaun kle'an liu tan favór kontaktu:

Luis de Oliveira Sampaio
Diretór Ezekutivu JSMP

Telefone: 3323883|77295795

Diresaun e-mail: luis@jsmp.minihub.org

info@jsmp.minihub.org

Website: www.jsmp.tl

Facebook: www.facebook.com/timorleste.jsmp

Twitter: @JSMPtl